

Carta Tsa Jacuhun Ra Pablo Tsi Ra Tito

Nu tyaa ra Pablo carta tsa cuenda ra Tito

1 ¹ Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñi Nyoo. ² Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandaví ñaha ra. ³ Tan vityin tsa tahañ tsi quivi tsa tyaa Nyoo cuhva tyin coto yo tuhun ra. Maa ra cuví ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi. ⁴ Jaquitsí yu carta ihya tsi un, Tito, tyin nditsa tyin cuví un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

Tyiñu tsahá ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵ Nacoq yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuví ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un. ⁶ Tyin ra tsahnu cuví ityi nuu tsihin nyivi vehe ñuhu, cuñi tsi cuví ra iin ra iyó intuhun ñi ñasihí, tan tsinú iñi tandihí sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña

tuhvá nyivi tyaa cuatyí siqui sehe ra. Tun tacan iyó ra, cuví cuví ra ityi nuu tsihin nyivi vehe ñuhu. ⁷ Tyin ra cuví ityi nuu tsihin ñi yihí cuenda Nyoo, maa Nyoo tsahá tyiñu can tsi ra. Yacan cuenda ñiñi cuñi tsi tsa cuví ra iin ra cuiti iyó nuu Nyoo. Iin ra cahnu jahá tsi ña cuví cuví ra ityi nuu tsihin nyivi vehe ñuhu, ndi iin ra ndihí iñi, ndi iin ra tuhvá tsihí, ndi iin ra nducú tsihí, ndi iin ra jaha canaa xuhun tsihin iin cuhva ña vaha. ⁸ Maa tyin cuñi tsi cuví ra iin ra sii cuñi tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuví ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra. ⁹ Cuñi tsi cunycun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuaha ra tsi nyivi caahán tyin ña nditsa tuhun caahán yo. ¹⁰ Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra. ¹¹ Cuñi tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun. ¹² Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyehen: “Nyivi Creta, vatya xaan ñi. Cuví ñi tumaa cuví quití. Cuaha xaan tsatsí ñi tan jutsan xaan ñi”, catyi ra. ¹³ Tan nditsa tsa cahan ra. Yacan cuenda

cuñí tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. **14** Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñí coto tsa nditsa.

15 Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñí ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñí ñi, tyin nda cuanda cuhva tsicá iñi ñi tan tsa tsiñi tuñi iñi ñi tan ña vaha.

16 Catyí ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

Tuhun vaha tsa tsahá Nyoo tyin jacuaha yo

2 **1** Maa tyin yooho, jacuaha tsa vaha tsa nacatsí tahan tsihin tsa jacuahá Nyoo tsi yo. **2** Jacuaha tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyivi. Tan cunyeer iñi ra naha tandihi náa tundoho nyehé ra naha. **3** Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi. **4** Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi. **5** Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuví cahan nyivi ndavaha ñi siqui tuhun Nyoo tsa cuenda cuhva iyó ñi.

6 Tacan tucu ra cuatyí naha ra.

Cuhva cuenda tsi ra naha na catsi coo ra naha. **7** Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuaha tsi ra naha tsihin tsa vii tan tsihin tsa vaha. **8** Maa ñi tuhun vaha cahan un tyin tacan tan yoñi cuvi tyaa cuatyí siqui un. Tan ra xaan iñi tsi ndo naha ra ña cua ñihi ra naha cuhva cahan ra naha ndavaha ñi siqui ndo tan cua nducahan nuu ra naha.

9 Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihi tsa caahán tsitoho ra naha. Tan na ña nacahan ra naha nu caahán tsitoho ra naha. **10** Tan na ña suhu ra naha tsa tsii tsitoho ra naha. Na jaha vaha ra naha cuenda tandihi ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

11 Tyin Nyoo janahá ra tsa vaha tsa iyó tsi ra tsi nyivi tan cuñí ra jacacu ra tsi tandihi ñi. **12** Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñí ñi can. Tan cuiti coo yo nu ñuhu ñayivi ihya, na cundaca ñaha vaha yo tsi yo tumaa cuñí maa Nyoo. **13** Tan janahá tucu ra tsi yo nácaa cuatu yo tsa vaha tsa cua ñihi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuví Nyoo yo, ra cahnú cuví, ra jacacú tsi yo. **14** Tsahá ra ñayivi ra tsa cuenda yo tyin tacan tan jacacu ra tsi yo ndaha tandihi tsa caquiñi. Tan nacatyá ra tsi yo na cuví yo nyivi vaha, tan cuví yo tsii maa ra, tan javaha yo maa ñi maa tsa vaha. **15** Yacan cuñí tsi jacuaha un tsi nyivi. Jandu iin iñi ñi. Tan cahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñihi nyivi nácaa cahan nyaa ñi tsi un.

**Cuhva taahán tsi javaha nyívi
yihí cuenda Nyoo**

3 ¹ Janducuhun iñi tsi nyívi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi. ² Tan ña cahan ñi ndavaha ñi siqui nyívi. Ña cañi tahan ñi tsihin nyívi. Na cuvi ñi nyívi vaha. Na masu jaha ñi añima ñi tsihin tandíhi nyívi.

³ Tyin nda cuanda maa yo tan ña vaha javahá yo nu quítsi tsi. Soho xaan tsicoo yo. Ndava xaan iñi yo. Ña tsica yo ityi vaha tyin jandavi ñaha xaan nu ña vaha tsi yo. Tan tsindaca ñaha tandíhi tsa ña vaha tsa cuñi cuñu ñuhu yo tsi yo. Tan javahá yo tandíhi cuhva cuñi maa yo. Tan cuñi yo coo tandíhi tsa iyó tsi inga nyívi tsi yo. Ndasí tsica iñi yo nyehe yo tsi nyívi yo. Tan tacan tucu maa nyívi ndasí cuñi ñi nyehe ñi tsi yo. ⁴ Maa tyin Nyoo vaha xaan iñi ra tan jacacu ra tsi yo. Tsihin yacan janahá ra tsi yo tyin cuñi ra tsi tandíhi nyívi.

⁵ Ñavin tsa cuenda tsa vaha javahá yo tan jacacu ra tsi yo, tyin jacacu ra tsi yo tsa cuenda tsa cundaahvi iñi ra nyehe ra tsi yo. Tan tsihin niñi ra Jesús nacatyá ra cuatyí yo, tan nacacu tsaá yo jahá Tatyí Ii ra, tan tsahá ra ñayivi nyito coo yo. ⁶ Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí Ii ra añima yo. ⁷ Tsihin tsa vaha maa ra tan janduvahá ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo. ⁸ Tandíhi tuhun ihya tuhun nditsa cuví tsi. Tan cuñi yo tsa jañiñi xaan un cuhva cuenda un tuhun ihya tsi nyívi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyiñee tsi tsi tandíhi nyívi tatun

tyaá yahvi ñi itsi. ⁹ Maa tyin ña tyaa soho un nu caahán yuhu tahan nyívi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsí tata nyívi. Ña tyiñi un tsi un tsihin nyívi cañi tahan tsa cuenda ley tsa tyaa ra Moisés tsanaha. Tyin nduve náa jatyiñee yacan. Tan nduve tsa tsiñi tuñi tsahá can.

¹⁰ Tatun iyó nyívi cuñi natahvi sava tsi nyívi tsicá vehe ñuhu, cãna tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, cãsi nu caca ñi vehe ñuhu. ¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tavá ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyíi un. Tan quívi tsaá ra, nducu cuhva tan cuhun un nda ñuu Nicópolis tyin ndacan cua ñiñi tahan yo. Tyin tyaá yu cuhva tsa ndoo yu ndacan yoo vitsin. ¹³ Nducu cuhva jatyiñee un tsi ra Zenas ra tuhvá caahán ndaahvi tsaha nyívi, tan tsi ra Apolos. Tan cuhva tsa tsiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. ¹⁴ Na cutuhva nyívi yihí cuenda Nyoo javaha ñi tsa vaha tan jatyiñee ñi tsi inga nyívi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndíhi cahán ra Pablo

¹⁵ Tandíhi ra yucú tsihin yu, tsahá ra naha nacumi tsi un. Tan cuhva nacumi tsi tandíhi nyívi cuñi tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandíhi ndo.

Tan na cuvi tsi tacan ñi.